



10 September 2012

Pangsapuri jadi makmal proses dadah

Oleh Syed Ridzuwan Ismail dan Shaiffulazhar Misri
2012/09/10

Muar: Tiga unit pangsapuri mewah dekat Apartmen Pemandangan Tanjung di sini, dijadikan sebagai makmal memproses dadah dipercayai bernilai jutaan ringgit.

Tiga premis diserbu

Bagaimanapun, kegiatan yang didalangi satu sindiket itu berjaya ditumpaskan apabila ketiga-tiga premis itu diserbu polis awal pagi semalam.

Serbuan terhadap tiga unit kediaman yang terletak di tingkat bawah, satu dan dua, sebuah dari blok apartmen yang terletak di Jalan Junid itu dilakukan pada jam 6 pagi oleh anggota Jabatan Siasatan Jenayah Narkotik Polis Muar.

Susulan serbuan itu, polis setakat ini menahan sekurang-kurangnya tiga suspek berusia antara 20 hingga 50an, untuk membantu siasatan lanjut berhubung operasi makmal dadah berkenaan.

Polis dikatakan menemui sejumlah besar pelbagai jenis dadah yang disembunyikan dalam tiga unit kediaman terbabit serta peralatan memproses dadah yang berpusat di situ.

Sindiket dadah itu dipercayai memanfaatkan sistem keselamatan ketat pada pangsapuri terbabit bagi mengelak operasi mereka dikesan polis kerana semua pengunjung ke situ perlu melalui tapisan pengawal keselamatan.

Sehingga lewat petang semalam, anggota Forensik Polis Johor masih berada di tiga kediaman terbabit bagi mengenal pasti nilai dan jumlah sebenar dadah di situ, dikatakan lebih besar daripada rampasan bernilai RM18 juta yang dibuat Polis Johor di Pontian pada Jun lalu.